




ხაშურის მოახბა



№40(364)

2 ნოემბერი, სამშაბათი,

2022 წელი

ხაშურის მუნიციპალიტეტის მერმა და მუნიციპალიტეტის საკრებულოს თავმჯდომარემ ამომრჩევლებს, მერიისა და საკრებულოს მიერ, მიმდინარე ნედს განუდი მუშაობის ანგარიში ჩააბარეს

ადგილობრივი თვითმმართველობის შესახებ, საქართველოში მოქმედი კოდექსის თანახმად, თვითმმართველი ერთეულის მერი და საკრებულოს თავმჯდომარე ვალდებული არიან, ყოველი წლის ბოლოს, ამომრჩევლებს ანგარიში ჩააბარონ. კანონის ეს მოთხოვნა, ბუნებრივია, სრულდება ჩვენს მუნიციპალიტეტშიც და უკვე ტრადიციად იქცა, რომ ოქტომბრის ბოლოს ან ნოემბრის დასაწყისში, მერი და საკრებულოს თავმჯდომარე ამომრჩეველთა დიდ აუდიტორიას ხვდება, ასე იყო ამჯერადაც და 31 ოქტომბერს, სამუსიკო სკოლის დარბაზში, ბატონი თენგიზ ჩიტიაშვილი და ქალბატონი ნინო ლიპერტელიანი, აღნიშნული ანგარიშით, ამომრჩეველთა წინაშე წარსდგნენ. გახეთის დღევანდელ ნომერში მკითხველს შესაძლებლობა ეძლევა გაეცნოს ამ ანგარიშებს.

მერის ანგარიში

2021 წლის ადგილობრივი თვითმმართველობის არჩევნებზე ხაშურელმა ამომრჩეველმა ნდობა გამოუცხადა ქართული ოცნების გუნდს და პირადად მეც. ამ ნდობის გამართლება და შესაძლებლობის მაქსიმუმის გაკეთება, ჩვენი მუნიციპალიტეტისთვის, ჩვენს მოვალეობად მიგვაჩნია.

ხაშურის მუნიციპალიტეტის 2022 წლის დამტკიცებული ბიუჯეტის მოცულობა განისაზღვრა 21 353 100 ლარის ოდენობით. მიმდინარე წლის განმავლობაში დამტკიცებულ ბიუჯეტში განხორციელებული ცვლილებების შედეგად, 2022 წლის დაზუსტებული ბიუჯეტის მოცულობა, დღეის მდგომარეობით, განისაზღვრა 35 176 700 ლარის ოდენობით.



2022 წლის ბიუჯეტით განსახორციელებელი ღონისძიებების დაფინანსების ძირითად წყაროს წარმოადგენს საკუთარი შემოსულობები, მათ შორის: საწარმოთა ქონების გადასახადი, სასოფლო და არასასოფლო სამეურნეო დანიშნულების მიწაზე ქონების გადასახადი, ბუნებრივი რესურსებით სარგებლობის მოსაკრებელი, მშენებლობის ნებართვის მოსაკრებელი, დასახლებული ტერიტორიის დასუფთავების მოსაკრებელი, არაფინანსური აქტივების გაყიდვიდან (პრივატიზაციიდან) მიღებული შემოსავლები და დამატებითი ღირებულების გადასახადი. ბიუჯეტში დამატებითი ღირებულების გადასახადიდან, მიმდინარე წელს, მისაღებად გათვალისწინებულია 18 035 000 ლარი, ქონების გადასახადი 2 950 000 ლარი, ასევე, გათვალისწინებულია მიზნობრივი დანიშნულების ტრანსფერი, დელეგირებული უფლებამოსილების განსახორციელებლად 250 000 ლარის ოდენობით.

„საქართველოს რეგიონებში განსახორციელებელი პოექტების ფონდიდან ადგილობრივი თვითმმართველი ერთეულებისათვის თანხის გამოყოფის შესახებ“ საქართველოს მთავრობის 2022 წლის 17 იანვრის №75 განკარგულების საფუძველზე, მუნიციპალიტეტს გამოეყო 5 859 529 ლარი, მუნიციპალური თანადაფინანსების თანხა შეადგენს 1 221 557 ლარს.

ხაშურის მუნიციპალიტეტის 2022 წლის ბიუჯეტით განსაზღვრულმა ფინანსურმა რესურსებმა მუნიციპალიტეტს მისცა ინფრასტრუქტურული პროექტებისა და სხვა პროგრამების დაფინანსების საშუალება და

(გაგრძელება II გვერდზე)

საკრებულოს თავმჯდომარის ანგარიში

ხაშურის მუნიციპალიტეტის საკრებულო უფლებამოსილებას შეუდგა 2021 წლის 3 დეკემბერს (განკარგულება №64. . საკრებულოს პირველი სხდომა მოხსენებით გახსნა ხაშურის 35-ე საოლქო საარჩევნო კომისიის წარმომადგენელმა მინდია ქურდაძემ, ხოლო სხდომას გაუძღვა საკრებულოს უხუცესი წევრი ალექსი ნოზაძე. ახალი მოწვევის საკრებულოში დეპუტატები წარმოდგენილი არიან შემდეგი პარტიული კუთვნილებით: პარტია „ქართული ოცნება-დემოკრატიული საქართველო“ უმრავლესობითაა წარმოდგენილი -16 წევრი, „ერთიანი ნაციონალური მოძრაობა“- 8 წევრი, „საქართველოსთვის“- 2 წევრი, „ლელო“-1 წევრი. ხაშურის მუნიციპალიტეტის საკრებულოს შემადგენლობაში მოქმედებს 5 კომისია და 3 ფრაქცია.

საკრებულოს ძირითადი უფლებამოსილება, ძირითადად, 5 დიდ კგუფად იყოფა, ესენია:

- პოლიტიკის განსაზღვრა;
- საფინანსო-საბიუჯეტო უფლებამოსილებები;
- აღმასრ. ორგანოს საქმიანობის რეგულირება და კონტროლი;
- მუნიციპალური ქონების მართვა და განკარგვა;
- ო რ გ ა ნ ი ზ ა ც ი უ ლ ი საკითხების განსაზღვრა;

საკრებულოს წევრს ძირითადი საქმიანობის 11 სხვადასხვა როლი აქვს:

- პ ო ლ ი ტ ი კ ი ს განმსაზღვრელი (ჩართულია სტრატეგიის შემუშავებაში...);
- გ ა და წ ყ ვ ე ტ ი ლ ე ბ ი ს მიმღები (ეს განსაზღვრავს საქმიანობის ეფექტიანობას...);
- კომუნიკატორი (იღებს და გასცემს სარწმუნო ინფორმაციას...);
- ფასილიტატორი (მუშაობს გუნდურად, მხარს უჭერს თანამშრომლობას...);
- ხელშემწყობი (იპოვოს გამოსავალი, იყოს საქმეების რეალიზატორი...);
- მოლაპარაკებების მწარმოებელი...;
- ფინანსისტი (საჯარო ფულადი რესურსის სწორად ხარჯვა...);
- მეთვალყურე (მონიტორინგი...);
- გავლენიანი (უფლებამოსილების გამოყენება...);
- შესაძლებლობების შემქმნელი (ინიციატივები...);
- ლიდერი (საქმის ცოდნა და კეთება...).

ჩემს მიერ მხარდაჭერილი პროექტები:

-2021 წლის 14 დეკემბერს, საკრებულოს რიგგარეშე სხდომაზე, განიხილებოდა 1 საკითხი- „ხაშურის მუნიციპალიტეტის 2022 წლის ბიუჯეტის პროექტის დამტკიცების შესახებ“. მოხდა ხაშურის მუნიციპალიტეტის 2022 წლის ბიუჯეტის პროექტის მუხლობრივი განხილვა და ღია კენჭისყრაც ჩატარდა მუხლობრივად. 2022 წლის ბიუჯეტის მოცულობა, წინა წელთან შედარებით, 18,2% პროცენტით იყო გაზრდილი და 21 353 100 ლარს ლარს შეადგენდა. ღია კენჭისყრით, ხაშურის მუნიციპალიტეტის 2022 წლის ბიუჯეტის პროექტი მიღებულ იქნა ხაშურის მუნიციპალიტეტის საკრებულოს სიითი შემადგენლობის 1/2-ზე მეტის მიერ.

-2022 წლის 3 თებერვალს, საკრებულოს მორიგ სხდომაზე, მოისმინეს საბიუჯეტო სამსახურის ხელმძღვანელის ინფორმაცია დამტკიცებულ ბიუჯეტში ცვლილებების შეტანის თაობაზე, რომლის მიზეზსაც წარმოადგენდა „საქართველოს რეგიონებში განსახორციელებელი პროექტების ფონდიდან მუნიციპალიტეტისათვის თანხის გამოყოფა“.

-2022 წლის 1 აპრილს, სამოქალაქო ბიუჯეტირების პროექტის წინამოსამზადებელი შეხვედრა გაიმართა არასამთავრობო ორგანიზაცია „მშვიდობის, დემოკრატიისა და განვითარების კავკასიური ინსტიტუტის“ ექსპერტებთან. ამ მიზნით, მუნიციპალიტეტის ბიუჯეტში 300 000 ლარი იქნა გათვალისწინებული. განსაზღვრული კრიტერიუმების შესაბამისად, მოქალაქეებმა თავად მიიღეს გადაწყვეტილება თუ რომელი პროექტი უნდა განახორციელდეს.

(გაგრძელება V გვერდზე)

მერის ანგარიში

(გაგრძელება)

შესაბამისად, ამ პროგრამების ძირითადი მიზნების შესრულების შესაძლებლობა.

2022 წლის 1 იანვრიდან 2022 წლის 1 ოქტომბრამდე, ხაშურის მუნიციპალიტეტის მიერ, გამოცხადებული იქნა 144 ტენდერი, საიდანაც 80 ტენდერი დასრულდა დადებითი შედეგით, ანუ გაფორმდა ხელშეკრულებები სახელმწიფო შესყიდვის შესახებ, აღნიშნული ტენდერების სავარაუდო ღირებულება შეადგენს - 25 476 946.50 ლარს, ხელშეკრულებების ჯამური ღირებულება შეადგენს - 22 637 595.50 ლარს, ეკონომია შეადგენს - 2 839 351.00 ლარს. გამოცხადებული ტენდერებიდან არ შედგა 41 ტენდერი, 16 ტენდერი დასრულდა უარყოფითი შედეგით, 4 ტენდერი მიმდინარეა, ხოლო 3 ტენდერი შეწყვეტილია.

2022 წლის 1 იანვრიდან - 30 სექტემბრის ჩათვლით, სულ განხორციელებულია 197 შესყიდვა, რამაც, გაფორმებული ხელშეკრულებების მიხედვით, შეადგინა 23 968 327.68 ლარი.

ზემოაღნიშნული შესყიდვებიდან გამარტივებული შესყიდვის საშუალებით გაფორმებულია 107 ხელშეკრულება 1 005 545.11 ლარის შესყიდვაზე

ელექტრონული ტენდერების საშუალებით გაფორმებულია 92 ხელშეკრულება 22 962 782.57 ლარის შესყიდვაზე.

მუნიციპალიტეტი აქტიურად არის ჩართული ინფრასტრუქტურული



პროექტების განხორციელების საქმეში:

საქართველოს მთავრობის №185 დადგენილების საფუძველზე („განახლებული რეგიონები“) ქალაქ ხაშურში წმინდა დიმიტრი ყიფიანის სახელობის სკვერის სარეაბილიტაციო სამუშაოების დასაფინანსებლად, ხაშურის მუნიციპალიტეტს გამოეყო 523 248 ლარი, პროექტი დასრულებულია. ამავე პროექტის ფარგლებში, მოეწყო სადგურის მოედანი, მიმდინარეობს ადმინისტრაციული შენობის, დიმიტრი ყიფიანის სახელობის სკოლის, ხაშურის მხარეთმცოდნეობის მუზეუმის და მიმდებარე შენობების ფასადების რეაბილიტაცია და განათება.

როგორც აღვნიშნეთ, „საქართველოს რეგიონებში განსახორციელებელი პოექტების ფონდიდან ადგილობრივი თვითმმართველი ერთეულებისათვის თანხის გამოყოფის შესახებ“ საქართველოს მთავრობის 2022 წლის 17 იანვრის №75 განკარგულების საფუძველზე მუნიციპალიტეტს გამოეყო 5 859 529 ლარი. აღნიშნული თანხა გადანაწილდა შემდეგ პროექტებზე:

1. დასრულდა სოფელ ნაბახტევში გზის მოასფალტების სამუშაოები;
2. სოფელ ვაყის ხიდიდან სოფელ ტკოცამდე (I და II ეტაპი) გზის მოასფალტების სამუშაოები;
3. მიმდინარეობს სოფელ ცოცხნარამდე და სოფელ ქემფერამდე გზის მოასფალტების სამუშაოების გარდამავალი პროექტი;
4. ჩქაროსნული ავტომანქანებისგან გაგარინის ქუჩამდე მისასვლელი გზის მოასფალტება;
5. სოფელ ბრილში მისასვლელი გზის მოასფალტება.

მაღალმთიანი დასახლებების განვითარების ფონდიდან მუნიციპალიტეტებისათვის თანხის გამოყოფის შესახებ საქართველოს მთავრობის 2022 წლის 25 მაისის №926 განკარგულების საფუძველზე ხაშურის მუნიციპალიტეტს გამოეყო 500 000 ლარი, მუნიციპალურმა თანადაფინანსებამ შეადგინა 26 000 ლარი პროექტისათვის სოფელ ბულბულისციხეში გზის მოასფალტების სამუშაოები. პროექტი გარდამავალია და დასრულდება 2023 წელს.

„საქართველოს მუნიციპალური განვითარების ფონდის“ და ხაშურის მუნიციპალიტეტს შორის გაფორმებული „საინვესტიციო დაფინანსების ხელშეკრულების ფარგლებში განხორციელდა ხაშურში საფეხბურთო სტადიონის მშენებლობა. აღნიშნული პროექტის მთლიანმა მოცულობამ შეადგინა 6 490 790 ლარი, შედეგად, ხაშურს უკვე აქვს თანამედროვე სტანდარტების სტადიონი, რამაც მნიშვნელოვნად შეუწყო ხელი ზოგადად ფეხბურთის პოპულარიზაციას და აამაღლა ხაშურის „ივერიის“ ფეხბურთელთა მოტივაცია.

საქართველოს მთავრობის 2021 წლის 27 დეკემბრის განკარგულების „საჯარო ფინანსების მართვის რეფორმის 2018-2021 წლების სტრატეგიის“ ფარგლებში ზოგიერთი მუნიციპალიტეტის მიერ

ფინანსების მართვის გაუმჯობესების ხელშეწყობის მიზნით 2021 წელს განსაზღვრული ღონისძიებების შესრულებიდან გამომდინარე, ზოგიერთი მუნიციპალიტეტისათვის კაპიტალური გრანტის გამოყოფის შესახებ“ საფუძველზე ხაშურის მუნიციპალიტეტმა დააკმაყოფილა მოთხოვნილი კრიტერიუმები და მოიპოვა გრანტი 400 000 ლარი, რამაც მოგვცა შესაძლებლობა რეაბილიტირებულ იქნას ზემო სერის ტყე-პარკი, აქედან რეაბილიტაციისათვის გრანტი, 400 000 ლარი, ხოლო თანადაფინანსება 403 897 ლარი, სულ -803 897 ლარი. სარეაბილიტაციო სამუშაოების პირველი ეტაპი უკვე დაწყებულია. დაგეგმილია ველობილიკების მოწყობა, ამფითეატრის გაკეთება. ზემო სერის ტყე-პარკის რეაბილიტაციას ხაშურელები განსაკუთრებულ მნიშვნელობას ანიჭებენ და ამიტომ ეს პროექტი ჩვენთვისაც ძალიან ღირებულია. ამასთან, ზემო სერის ტერიტორიაზე მალე გაიხსნება პროფესიული სასწავლებელი, დაგეგმილია თანამედროვე სარაგბო ბაზის მოწყობა, გრძელდება ახალი ბანას ტაძრის მშენებლობა, რაც ტერიტორიას ახალ და მძლავრ სიცოცხლეს შესძენს და მიმზიდველს გახდის როგორც ადგილობრივებისთვის, ისე ტურისტებისთვისაც.

ხაშურის მუნიციპალიტეტის ადგილობრივი ბიუჯეტის მხარდაჭერით დასრულდა ქალაქ ხაშურში, თამარ მეფის ქუჩაზე მდებარე მუსიკალური სკოლის მიმდებარე ტერიტორიის რეაბილიტაციის სამუშაოები, სულ თანხით - 300 000 ლარი.

ასევე, ხაშურის მუნიციპალიტეტის ადგილობრივი ბიუჯეტით დასრულდა და მიმდინარეობს რიგი პროექტები - დაბა სურამში ბაიანთხევის დასახლებაში ბეტონის გზის დაგება, სოფელ ტეხერში ბეტონის გზის დაგება, სურამში, ჩუმათელეთის დასახლებაში, მე-2 ჩიხის მოასფალტება, სოფელ დიდ და პატარა სატივეში მისასვლელი გზის მოასფალტება, სოფელ გომში გადასასვლელი ხიდის რეაბილიტაცია, სოფელ გომში სასაფლაომდე მისასვლელი გზის მოასფალტება, ხაშურის მუნიციპალიტეტის სოფლებში ბეტონის გზის დაგება, ხაშურის მუნიციპალიტეტის ტერიტორიაზე ქუჩების კაპიტალური ორმოული შეკეთება და ა.შ.

მოგეხსენებათ, ქალაქ ხაშურის ცენტრალურ ნაწილში, რუსთაველის ქუჩაზე მოძრაობა მუდმივად გადატვირთულია. მერიას არაერთმა მოქალაქემ მომართა ამ პრობლემის გადაწყვეტის თხოვნით. შესაბამისად, დაიგეგმა საგზაო უსაფრთხოების გაძლიერების და საგზაო მოძრაობის მოწესრიგების მიზნით, რუსთაველისა და მიმდებარე ქუჩების ცალმხრივი საგზაო მოძრაობის დაგეგმარება და საგზაო ნიშნების მოწესრიგება, სულ თანხით - 735 461 ლარი.

„საქართველოს სახელმწიფო ბიუჯეტით გათვალისწინებული საქართველოს რეგიონებში განსახორციელებელი პოექტების ფონდიდან სოფლის მხარდაჭერის პროგრამის ფარგლებში მუნიციპალიტეტებისათვის თანხის გამოყოფის შესახებ“ საქართველოს მთავრობის 2022 წლის 15 თებერვლის 277 განკარგულების საფუძველზე, ხაშურის მუნიციპალიტეტს გამოეყო 904 000 ლარი, მუნიციპალური თანადაფინანსება 550 000 ლარი, მიმდინარეობს წყლის სისტემების რეაბილიტაცია, გარე გამოყენების ტრენაჟორების მოწყობა, ბეტონის გზების დაგება, გზების მოხრეშვა, სკვერების მოწყობა, სანიაღვრე არხების გაყვანა, სასაფლაოების შემოღვა და მოსაცდელების მოწყობა.

მუნიციპალიტეტის ტერიტორიაზე დასრულდა და მიმდინარეობს სპორტული ინფრასტრუქტურის - სტადიონებისა და სპორტული მოედნების მოწყობა-რეაბილიტაცია, კერძოდ, სოფელ წაბლოვანაში და დიდ ფლევში მინი სტადიონის მოწყობის სამუშაოები, ჭალისუბნის დასახლებაში ყოფილი აგურის ქარხნის ტერიტორიაზე, მინისტადიონის მოწყობა, სოფელ ახალუბანში მინისტადიონის მოწყობა, ქ.ხაშურში, თავდადებულის ქუჩაზე არსებულ სტადიონზე მორაგებებისთვის გასახდელელების მოწყობა, სოფელ ქემფერში მინისტადიონის რეაბილიტაციის სამუშაოების შესყიდვა, სოფელ ბიჯნისში მინისტადიონის მოწყობა, ფარნავაზ მეფის 7 მიმდებარედ არსებული სტადიონის რეაბილიტაცია, დაბა სურამში 9 აპრილის ქუჩე, არსებული სტადიონის რეაბილიტაცია, მე-7 საჯარო სკოლის მიმდებარედ სპორტული მოედნის მოწყობა დაბა სურამში, 9 აპრილის ქუჩაზე, არსებული ცენტრალური სპორტული სტადიონის რეაბილიტაციის სამუშაოები, ქალაქ ხაშურში, გაგარინის ქ.

72-ის მიმდებარედ არსებული სტადიონის რეაბილიტაციის სამუშაოები, სოფელ ურთხვამი მინისტადიონის რეაბილიტაცია და დაბა სურამში, იტრის დასახლებაში მინისტადიონის რეაბილიტაცია, სულ თანხით 1 594 708 ლარი.

მუნიციპალიტეტის ტერიტორიაზე დასრულდა და მიმდინარეობს - პარკებისა და სკვერების მოწყობა-რეაბილიტაცია. კერძოდ, დაბა სურამში რკინის წყლის ტერიტორიის რეაბილიტაცია, ჩუმათელეთის დასახლებაში ატრაქციონების მოწყობა და ტერიტორიის შემოღობვა, სოფელ ზეკოტაში ფანჩატურის და გარე ტრენაჟორების მოწყობა, დ. სურამში ლესია უკრაინკას სკვერის რეაბილიტაცია; დაბა სურამში 9 აპრილის ქუჩაზე არსებული სკვერის რეაბილიტაცია, სარაჯიშვილის ქუჩის მიმდებარედ საბავშვო ატრაქციონების მოწყობა, ფარნავაზ მეფის ქუჩა №7-ის მიმდებარედ არსებული სკვერის რეაბილიტაციის სამუშაოების შესყიდვა, სულ თანხით 1 054 071 ლარი.

გარე განათებიდან მიმდინარეობს ქ. ხაშურში ცენტრალურ მოედანზე, ფასადებზე და დაბა სურამში სურამის ციხეზე დეკორატიული განათებების მოწყობა - 69 283 ლარი, სპეციალური ტექნიკის ამწე კალათის შესყიდვა - 69 466 ლარი.

2022 წლიდან ხაშურის მუნიციპალიტეტი პირველად, საპილოტე რეჟიმში, ახორციელებს ინოვაციურ პროექტს „მონაწილეობითი ბიუჯეტირება“, რაც გულისხმობს ადგილობრივ დონეზე მართვის ინოვაციურ მეთოდებს, ფინანსების ყაირათიან და შედეგზე ორიენტირებულ განკარგვას, ასევე,

(გაგრძელება III გვერდზე)

მერის ანგარიში

(გაგრძელება)

მოსახლეობის მაქსიმალურ ჩართვას როგორც გადაწყვეტილების მიღების, ისე პროექტების განხორციელების მონიტორინგსა და შედეგების შეფასების პროცესებში. საწყის ეტაპზე, მონაწილეობითი ბიუჯეტირების პროექტი სურამში, ქვიშხეთსა და ცხრამუხაში გამხორციელდა. მოწილეობითი ბიუჯეტირების პროცესში მოსახლეობა თავად განსაზღვრავს საკუთარ საჭიროებებს და თავადვე წყვეტს, თუ რა პროექტები უნდა განხორციელდეს. მონაწილეობითი ბიუჯეტირება არის ნებაყოფლობითი, უნივერსალური და უშუალო (პირდაპირი) დემოკრატიის პროცესი, რომლის საშუალებითაც ხალხი აწარმოებს დიალოგს და იღებს გადაწყვეტილებას ბიუჯეტისა და სახელმწიფო პოლიტიკის შესახებ. შესაბამისად, ბიუჯეტის ასიგნებებმა 2022 წლის ბიუჯეტში შეადგინა 456 861 ლარი (სურამი - 211 802 ლარი, ქვიშხეთი - 73 340 ლარი, ცხრამუხა 171 719 ლარი), რეალურად, ახალი საარჩევნო სისტემით, ელექტრონული ხმის მიცემის პროცედურების მეშვეობით, განხორციელდა საპროექტო იდეების წარდგენა, გადარჩევა და გამარჯვებული პროექტების გამოვლენა.

2022 წლიდან ხაშურის მუნიციპალიტეტი აქტიურად თანამშრომლობს გერმანიის საერთაშორისო თანამშრომლობის საზოგადოებასთან - გენდერზე ორიენტირებული ბიუჯეტის პოლიტიკის დანერგვაში. აღნიშნული მიდგომა ხელს უწყობს მოსახლეობის ყველა ჯგუფის საჭიროებების, მათ შორის, ქალების, კაცების და ყველა სამიზნე ჯგუფის (ხანში შესულები, ბავშვები, ქალები, კაცები და ა.შ.) და მათ საჭიროებებზე მორგებულად მათი ინტერესების გათვალისწინებას ადგილობრივი ბიუჯეტირების პროცესში, ამასთან, გენდერული თანასწორობის ასპექტების ჩართვას მუნიციპალიტეტის საბიუჯეტო პროცესში.

2022 წლიდან, მთავრობის ადმინისტრაციას და გერმანიის საერთაშორისო თანამშრომლობის საზოგადოებასთან ხანგრძლივი კონსულტაციების შედეგად, ხაშურის მუნიციპალიტეტის წინაშე არსებული გამოწვევებისა და თვითმმართველი ერთეულის კონტექსტის გათვალისწინებით - განისაზღვრა გაეროს მდგრადი განვითარების 25 მიზანი და 22 ამოცანა მუნიციპალურ პრიორიტეტად. მდგრადი განვითარების მიზნები მსოფლიოს გარშემო აერთიანებს ქვეყნების ხელისუფლებებსა და მოსახლეობას შემდეგი ღირსეული ამოცანების შესასრულებლად: სიღარიბისა და შიმშილის აღმოფხვრა, ჯანდაცვისა და განათლების სისტემის გაუმჯობესება, თანასწორობის ხელშეწყობა, ქალაქების მდგრადობა და ა.შ. მდგრადი განვითარების მიზნების ადგილობრივ დონეზე დანერგვის პროცესში ჩართული იყო მუნიციპალიტეტის მერიის ყველა შესაბამისი სამსახური, მუნიციპალიტეტის საკრებულო და სამოქალაქო საზოგადოების წარმომადგენლები.

როგორც მოგეხსენებათ, საბავშვო ბაღებზე ზრუნვა ჩვენი ხელისუფლების ერთ-ერთი მთავარი პრიორიტეტია. სადღეისოდ, მუნიციპალიტეტში ჩვენს პატარებს ემსახურება სრულად რეაბილიტირებული 18 საბავშვო ბაღი. მიმდინარე წელს, რეაბილიტაცია ჩაუტარდა მე-6 საბავშვო ბაღის სახურავს, შშმ ბავშვთათვის გაიხსნა სარეაბილიტაციო ცენტრი. განსაკუთრებული ყურადღება ეთმობა აღსაზრდელთათვის საერთაშორისო სტანდარტების სრულ შესაბამისობაში მყოფი პირობების შეთავაზებას როგორც კვებისა და ჰიგიენის, ისე სასწავლო-სააღმზრდელო პროგრამების მიმართულებით. მუნიციპალიტეტის მიერ დაფუძნებული ა(ა)იპ "ხაშურსერვისის" მიერ ქალაქისა და სოფლის ზონების დასუფთავების და სანიტარული ღონისძიებების გატარების მიზნით, მუნიციპალიტეტის ტერიტორიაზე განთავსებულია 1100 ლიტრიანი 796 ცალი ნაგვის კონტეინერი (298 ცალი პლასტმასი, 498 ცალი რკინის) , გამოიყენება ექვსი ერთეული ნაგავმომკრები სპეცტექნიკა და ხუთი სატვირთო ავტომანქანა. ყოველდღიურად ქ.ხაშურში იგვება 48100 მ², ხოლო დაბა სურამში 15500 მ² ფართი. თვეში ერთხელ ვახორციელებთ ქ.ხაშურში და დაბა სურამში საავტომობილო მაგისტრალის მიმდებარე ტერიტორიის დასუფთავება -გაწმენდას 638000 მ²- ზე. გარე-განათების სისტემის მოვლა-პატრონობის მიზნით, ლამპიონებისა და სხვა ელექტრომასალის შესამენად ჩატარდა 83695 ლარის მთლიანი ღირებულების 2 ტენდერი.

შიდა გზების მოვლა-პატრონობისთვის კი 2022 წლის 1 ოქტომბრის მდგომარეობით დაიხარჯა 257544 ლარი.

მიმდინარე წელს, ცალკე სტრუქტურად ჩამოყალიბდა წყლისა და გამწვანების კომპანია, რაც მუნიციპალიტეტს საშუალებას მისცემს მეტი ყურადღება დაუთმოს ქ. ხაშურში არსებული სკვერების, გაზონებისა მწვანე ნარგავების მოვლას და მუნიციპალიტეტის დაქვემდებარებაში არსებული წყლის სისტემების რეაბილიტაციას.

მუნიციპალიტეტის მერია მნიშვნელოვან ყურადღებას უთმობს სოციალური დაცვის სფეროში მუნიციპალური რესურსების მობილიზებას.

2022 წელს, სამსახურის მიერ შემუშავებულ იქნა ფულადი დახმარების სხვადასხვა მუნიციპალური პროგრამა, რომელთა ფინანსური მოცულობა შეადგენს 1 147 400 ლარს. მათ შორის:

- ა) საზოგადოებრივი ჯანმრთელობის მუნიციპალური პროგრამა - 105 400 ლარი;
- ბ) სოციალურად დაუცველი მოსახლეობის ფულადი სოციალური დახმარების მუნიციპალური პროგრამა - 809 800 ლარ;
- გ) შეზღუდული შესაძლებლობების მქონე მოსწავლეთა სოციალური მომსახურების პროგრამა - 38 200 ლარი;
- დ) კონფლიქტის ზონასთან მიმდებარე და მთიანი სოფლების საჯარო სკოლების პედაგოგების უფასო მგზავრობის უზრუნველყოფის მუნიციპალური პროგრამა - 24 000 ლარი;
- ე) უმწეოთა უფასო კვების მუნიციპალური პროგრამა - 170 000 ლარი;

გაწეული დახმარების მთლიან მოცულობაში მნიშვნელოვანი წილი უკავია ქრონიკული დაავადების მქონე ავადმყოფების უფასო მედიკამენტებით უზრუნველყოფას. აღნიშნული მუხლით დაფინანსება ეხება შემდეგი კატეგორიის ავადმყოფებს: ეპილეფსიით, ონკოლოგიურ, დაუნის სინდრომით, ინსულტით, ჰემოფილით, ღვიძლის ციროზით, სისტემური და ეპიდემიის შედეგად დაავადებულებს 100 ლარის ოდენობით, ბრონქული ასთმა, პარკინსონი, 300 ლარის ოდენობით და აორტო-კორონარული შუნტირებით 500 ლარის ოდენობით, ამ მიზნით დახმარება გაეწია 33-ზე მეტ ბენეფიციარს 13 483 ლარის ოდენობით.

მნიშვნელოვანი ყურადღება ეთმობა ქრონიკული დაავადების მქონე ბავშვების/ მოზარდების რეაბილიტაციის კურსის დაფინანსებას. სქოლიოზით დაავადებულ 31 მოზარდს გაეწია დახმარება და ჩაუტარდა რეაბილიტაციის სრული კურსი, რამაც 9 250 ლარი შეადგინა.

მიმდინარე წლის მუნიციპალური პროგრამით ფულადი სოციალური დახმარება გაეწია მკვეთრად შეზღუდული შესაძლებლობის მქონე უსინათლო პირებს და იმ პირებს რომლებიც დამოუკიდებლად ვერ გადაადგილდებიან, ან საჭიროებენ მოძვლელს. აღნიშნული კატეგორიის 119 ბენეფიციარს გაეწია 35 900 ლარის ფულადი დახმარება.

სოციალურად დაუცველი მოსახლეობის მკურნალობის ხელმისაწვდომობის გაზრდის მიზნით, დადებითი როლი ითამაშა ზოგიერთი კატეგორიის მოსახლეობის სამედიცინო მომსახურების თანადაფინანსებამაც. ამ მუხლით ფინანსდებიან:

- 1. ა) ავადმყოფები, რომლებიც საჭიროებენ გეგმიურ ქირურგიულ ჩარევას;
- ბ) ავადმყოფები, რომლებიც საჭიროებენ მაღალტექნოლოგიურ გამოკვლევებს (ბირთვულ მაგნიტურ-რეზონანსული გამოკვლევა, კომპიუტერული ტომოგრაფია და იმუნოჰისტოქიმიური კვლევა);

2. ავადმყოფები, რომელთა სამედიცინო მომსახურებას არ აფინანსებს სადაზღვევო კომპანია, ან საყოველთაო ჯანმრთელობის დაცვის სახელმწიფო პროგრამა;

3. ავადმყოფები, რომლების საჭიროებენ სხივური და ქიმიოთერაპიის კურსის თანადაფინანსებას;

მე-2 პუნქტით- „ავადმყოფები, რომელთა სამედიცინო მომსახურებას არ აფინანსებს სადაზღვევო კომპანია, ან საყოველთაო ჯანმრთელობის დაცვის სახელმწიფო პროგრამა“-დახმარების გაცემის შესაძლებლობას, მიზანშეწონილებას და მოცულობას (არაუმეტეს 2000 ლარისა) განსაზღვრავს 2018 წლის 23 მაისს ხაშურის მუნიციპალიტეტის მერის ბრძანებით შექმნილი სამუშაო ჯგუფი. აღნიშნული მუხლით ფულადი დახმარება გაეწია 565 ბენეფიციარს, რამაც სულ შეადგინა 289 341.78 ლარი.

ასევე დაფინანსდა 28 ხელმოკლე სტუდენტი. მათ სწავლის ღირებულების თანადაფინანსებისათვის 800 (არაუმეტეს) ლარის ფარგლებში უმაღლეს სასწავლებელში ჩაერიცხათ 22 162.50 ლარი;

თირკმლის დიალიზის პროგრამაში ჩართულმა 37 ბენეფიციარმა მიიღო დაფინანსება 18 500 ლარის ოდენობით;

მრავალშვილიან (ოთხი და მეტი შვილი) დედებს, რომლებსაც შეეძინათ ოთხი და მეტი შვილი, ასევე, დედის დღესთან დაკავშირებით, 341 მრავალშვილიან დედას გაეწიათ ფინანსური დახმარება 116 600 ლარის ოდენობით.

გრძელდება სოციალური დახმარების გაწევა დედ-მამით ობოლ ბავშვებზე. დღეის მდგომარეობით მუნიციპალიტეტში ასეთმა 3 ბავშვმა მიიღო დახმარება 1400 ლარის ოდენობით.

მიცვალებულთა სარიტუალო მომსახურება (ომის ვეტერანი, დევნილი, უპატრონო მიცვალებული) გაეწია 8 ბენეფიციარს 2000 ლარის ოდენობით.

სასჯელაღსრულების დაწესებულებიდან განთავისუფლებული პირების რესოციალიზაცია გაეწია 2 ბენეფიციარს 400 ლარის ოდენობით.

აუტიზმის სპექტრის მქონე მოზარდების (0 დან -18 წლამდე) სამედიცინო მომსახურების თანადაფინანსება გაეწია 15 ბენეფიციარს 15 000 ლარის ოდენობით.

პარალელურად, გრძელდება წინა პერიოდში დაწყებული შეზღუდული შესაძლებლობის მქონე მოსწავლეების დღის მოვლის ცენტრის, მუნიციპალიტეტის სახელოვნებო სკოლების დევნილი და სოციალურად დაუცველი მოსწავლეების უფასო მომსახურების მუნიციპალური პროგრამები.

გარდა ამისა, უმწეო მდგომარეობაში მყოფი 185 მოქალაქე სარგებლობს უფასო სასადილოს მომსახურებით, რომლის დანახარჯი დღეის მდგომარეობით შეადგენს 62 604 (6 თვე) ლარს;

გრძელდება კონფლიქტის გამყოფი ხაზის მიმდებარე და მთიანი სოფლების საჯარო სკოლების პედაგოგების უფასო მგზავრობის დაფინანსების მუნიციპალური პროგრამა.

მიმდინარე წელს სოციალურად დაუცველ 755 ოჯახს, შობისა და აღდგომის ბრწყინვალე დღესასწაულთან დაკავშირებით, კვების პროდუქტების პაკეტებით გაეწიათ დახმარება, რომლის ღირებულებამ შეადგინა 54 360 ლარი;

ასევე, ხანძრის შედეგად, უსახლკაროდ დარჩენილმა 5 ოჯახმა მიიღო ფულადი დახმარება 11 000 ლარის ოდენობით;

უკიდურესად გაჭირვებულ და უბინაო მოქალაქეებს (27 ოჯახი) ბინის ქირით უზრუნველსაყოფად ჩაერიცხათ 24 900 ლარი;

ომის ვეტერანთა 49 ოჯახს გაეწიათ ფულადი დახმარება ფაშიზმზე გამარჯვების და საქართველოს დამოუკიდებლობის დღესთან დაკავშირებით 300-300 ლარით. სულ ამ თანხამ შეადგინა 14 700 ლარი; ხაშურის მუნიციპალიტეტის საზოგადოებრივი ჯანმრთელობის

(გაგრძელება IV გვერდზე)

მერის ანგარიში

(დასასრული)

დაცვის 2018 წლის პროგრამით გათვალისწინებული გასატარებელი ღონისძიებების ფარგლებში შემოწმდა ქალაქ ხაშურისა და მუნიციპალიტეტში შემავალი სოფლების სკოლებისა და საბავშვო ბაღების სანიტარულ-ჰიგიენური და სანიტარულ-ტექნიკური მდგომარეობა. მუნიციპალიტეტის ტერიტორიაზე, ამ პერიოდში, ეპიდსიტუაცია დამაკმაყოფილებელია. ჩატარებულია ეპიდსაწინააღმდეგო ღონისძიებები. მიმდინარეობს სახელმწიფო პროგრამით გათვალისწინებული „ც“ ჰეპატიტის უფასო სკრინინგული კვლევები.

მუნიციპალიტეტი განსაკუთრებულ ყურადღებას უთმობს კულტურულ და სპორტულ ღონისძიებებს. მიმდინარე წლის დასაწყისში, იანვრის თვეში, ტრადიციულად, საზეიმოდ აღინიშნა შობა-ახალი წლის დღესასწაული. ახალი წლის ღამეს, ღია ცის ქვეშ, გაიმართა კონცერტი, რომელიც დასრულდა ფეიერვერკით.

14 იანვარს საქართველოში სახელმწიფო დროშის დღე აღინიშნება. განათლების, კულტურისა და სპორტის სამსახურის ორგანიზებით, ამ დღესთან დაკავშირებით, ხაშურში სახელმწიფო დროშები გამოიფინა.

8 მარტს, ქალთა საერთაშორისო დღესთან დაკავშირებით, სიმბოლური საჩუქრები გადაეცა სასწრაფო დახმარების ხაშურის ფილიალის და ა(ა)იპ „ხაშურის საზოგადოებრივი ჯანმრთელობის დაცვის ცენტრის“ ქალთა პერსონალს. ასევე, დასაჩუქრდნენ მუნიციპალიტეტში მცხოვრები უზუცესი ქალბატონები.

9 აპრილს, გვირგვინითა და 9 აპრილის სიმბოლო - წითელი ტიტებით შეიმკო დაღუპულთა ხსოვნის უკვდავსაყოფი მემორიალი.

9 მაისს, ფაშოზზე გამარჯვების 77-ე წლისთავთან დაკავშირებით, გვირგვინით შეიმკო მეორე მსოფლიო ომში დაღუპულთა ხსოვნის მემორიალი. აგრეთვე, ყვავილებითა და სიმბოლური საჩუქრებით დასაჩუქრდა მეორე მსოფლიო ომის მონაწილე, ხაშურის საპატიო მოქალაქე, ღვაწლმოსილი პედაგოგი ნინო ქურდაძე.

1 ივნისს, ბავშვთა დაცვის საერთაშორისო დღესთან დაკავშირებით, ქალაქის კულტურისა და დასვენების პარკში, ღია ცის ქვეშ, მუნიციპალიტეტის საბავშვო ბაღების მიერ გაიმართა გამოფენები, პატარების წინაშე წარსდგა თოჯინების თეატრი, მოწვეულმა ანიმატორებმა იზრუნეს ბავშვების საზეიმო განწყობაზე. ამასთანავე, განათლების, კულტურისა და სპორტის სამსახურის ხელშეწყობით, მუნიციპალიტეტის საზღვრისპირა სოფლების ბავშვები ქ. თბილისში დაესწრნენ 3 ფილმს და ჩაერთვნენ სხვადასხვა საბავშვო აქტივობებში.

8 აგვისტოს გვირგვინით შეიმკო აგვისტოს ომში დაღუპულთა საფლავები.

12-15 მაისს, ქალაქ ბათუმში, ტურიზმისა და სასტუმრო აღჭურვილობის რიგით მე-13 ფესტივალზე „ ხპო ატუმი ორაგელ 2022“, ჩვენი მუნიციპალიტეტი ღირსეულად წარმოადგინა განათლების, კულტურის და სპორტის სამსახურმა და გამოფენაში აქტიური მონაწილეობისათვის სერთიფიკატიც დაიმსახურა.

გრანდიოზული ღონისძიებებით აღინიშნა საქართველოს დამოუკიდებლობის დღე 26 მაისი. გვირგვინებით შეამკო საქართველოს ტერიტორიული მთლიანობისთვის დაღუპულ გმირთა მემორიალი, საქართველო- სომხეთის 1918-1919 წლების ომში ხაშურის რაიონიდან გარდაცვლილ მებრძოლთა სამძო სასაფლაო და სოფელ აძვისში, პატრიოტი მოქალაქის, დავით ნიკოლოზის ძე კაპანაძის საფლავი. ქალაქის ქუჩებში მოეწყო ეროვნული სამოსით კოსტუმირებული მსვლელობა. დიმიტრი ყიფიანის სახ. სკვერში მოეწყო ადგილობრივი შემოქმედების ნამუშევრების, მეწარმეების ნაწარმის და სამუზეუმო ექსპონატების (ხაშურის ხედების) გამოფენები. პატარების გართობაზე ანიმატორებმა იზრუნეს. დღის ბოლოს კი გაიმართა საზეიმო კონცერტი ადგილობრივი და მოწვეული მომღერლების მონაწილეობით. სადღესასწაულო განწყობა ფეიერვერკმა დაასრულა.

ლატვიის დამეგობრებულ ქალაქ ბაუსკას ფესტივალზე „ოქროს მუხის ქვეშ“, მიწვეულ ხაშურის მუნიციპალიტეტის დელეგაციისთვის, მასპინძელ მხარეზე გადასაცემად შეძენილ იქნა ადგილობრივი მეწარმეების მიერ წარმოებული პროდუქცია.

9 ივნისს ხაშურის სამუსიკო სკოლაში, საქართველოს ფოლკლორის ეროვნული ფესტივალის შესარჩევი ტური გაიმართა. ფესტივალში მონაწილეობდნენ ხალხური სიმღერის მუნიციპალური და თვითმოქმედი ანსამბლები, მგალობელთა გუნდები, წარმოდგენილი იყო: ხალხური რეწვისა და გამოყენებითი ხელოვნების ნიმუშები, სახვითი ხელოვნების ნიმუშები.

ივნისის თვეში ახალგაზრდულმა თეატრმა წარმოადგინა სპექტაკლი „თემა“

კულტურისა და დასვენების პარკში ჩატარდა, ანსამბლ „ფრესკას“ და ანსამბლ „ბასიანის“ კონცერტი, კულტურის სამსახურის მხარდაჭერით

15 ივლისს ქვიშხეთში, დიმიტრი ყიფიანის სახლ მუზეუმში გაიხსნა იაპონელი მკვლევარის გამოფენა ნიკო ფიროსმანის შემოქმედების შესახებ.

27 ივლისს ქ. ბათუმში ხელოვნების მე-9 საერთაშორისო ფესტივალზე, განათლების, კულტურის და სპორტის სამსახურის ორგანიზებით და მხარდაჭერით, მონაწილეობა მიიღეს ჩვენი მუნიციპალიტეტის წარმომადგენლებმა: ოპერის მომღერალმა ლევან ტაბატაძემ, ხაშურის სამუსიკო სკოლის მოსწავლეთა მევიოლინოთა ანსამბლმა და ქორეოგრაფიულმა ანსამბლმა „ფრესკამ“. მრავალფეროვანი

პროგრამის წარმოდგენით, ხაშურმა განსაკუთრებული მოწონება დაიმსახურა.

თეატრალური სეზონის გახსნიდან, პატარა მაყურებლებისათვის, რეგულარულად იმართება თოჯინების თეატრის სპექტაკლები.

10 აგვისტოს, ქალაქ ხაშურში, მინისტრის დასახლებაში ბიბლიოთეკა საზეიმოდ გაიხსნა.

17 აგვისტოს, დაბა სურამში, ცენტრალურ პარკში, გაიმართა მომღერალ პაატა გულიაშვილის და ხაშურის მუნიციპალიტეტის ბენდის „SPAM JAM“-ის ერთობლივი კონცერტი.

30 აგვისტოს, 17:00 საათზე, ქვიშხეთში, დიმიტრი ყიფიანის სახელობის სახლ-მუზეუმში, ახალგაზრდების ინიციატივით ჩატარდა ლიტერატურული ფესტივალი.

9 სექტემბერს, ხაშურში, კულტურისა და დასვენების პარკში კონცერტი გაიმართა. კონცერტში მონაწილეობდნენ: ზაზა ნოზაძე (Sf-X), სოფო საჟინიანი, ბენდი „Spam Jam“ და ბენდი „Classic Beat“.

ოქტომბრის დასაწყისში აღინიშნა მასწავლებლის დღე. მუნიციპალიტეტმა ფასიანი საჩუქრებით აღნიშნა ჩვენი დამსახურებული პედაგოგების წარმატება.

სულ ახლახანს კი ხაშურში გაიმართა ხაშურქალაქობის ტრადიციული დღესასწაული, სადაც მონაწილეობდნენ ადგილობრივი და მოწვეული შემსრულებლები, მეწარმეები, შემოქმედი ადამიანები. დიდი მადლობა ყველა იმ ადამიანს, ვინც ჩართული იყო ღონისძიებებში და ესწრებოდა ჩვენს დღესასწაულს.

მოსახლეობაში და განსაკუთრებით ახალგაზრდა თაობაში, ცხოვრების ჯანსაღი წესის დამკვიდრების თვალსაზრისით, აღნიშნულ პერიოდში, განხორციელდა სხვადასხვა დონის სპორტული რეგიონული, რესპუბლიკური და საერთაშორისო ტურნირები სპორტის შემდეგ სახეობებში: ფეხბურთი, კალათბურთი, რაგბი, ქართული ჭიდაობა, ჭიდაობა-მიუდო, ჭიდაობა-სამბო, ბერძნულ-რომაული ჭიდაობა თავისუფალი ჭიდაობა, ჭადრაკი, ძალოსნობა, ჩოგბურთი. ხაშურის მუნიციპალიტეტის სასპორტო სკოლის აღსაზრდელებმა საპრიზო ადგილები მოიპოვეს ევროპის ჩემპიონატებზე ჭიდაობა სამბოში, მიუდოში, კალათბურთსა და ძალოსნობაში. ასევე ჭიდაობის სხვადასხვა სახეობაში, რესპუბლიკის მასშტაბით გამართულ ჩემპიონატებზე არაერთმა სპორტსმენმა მოიპოვა საქართველოს ჩემპიონის ტიტული და სხვადასხვა საპრიზო ადგილი.

სასპორტო სკოლაში სპორტის ყველა სახეობაში არსებულ ჯგუფებში მიმდინარეობს უფასო სწავლება.

ხაშურის მუნიციპალიტეტის მერია გამოხატავს მხარდაჭერას და მოქმედ სპორტსმენებს და მათ მწვრთნელებს აფინანსებს საერთაშორისო მასშტაბით გამართულ ჩემპიონატებზე და შეკრებებზე მონაწილეობისათვის.

საანგარიშო პერიოდში, პროგრამის ასიგნების ფარგლებში, მოხდა სპორტული წარმატების მქონე სპორტსმენების და მათი მწვრთნელების დაჯილდოვება, აგრეთვე ფულადი ჯილდო გადაეცათ დამსახურების მქონე მწვრთნელებს.

ჩვენი ინიციატივით, ადგილობრივი ბიზნესის მხარდაჭერით და სპორტსმენთა ჩართულობით ხაშურის საფეხბურთო კლუბ „ივერიის“ განვითარების ფონდი შეიქმნა. მიგვაჩნია, რომ ფონდი მნიშვნელოვნად დაეხმარება ჩვენი საფეხბურთო კლუბის წინსვლას და განვითარებას.

აქტიურად მიმდინარეობს ახალგაზრდული ღონისძიებები. ორწლიანი პაუზის შემდეგ, განახლდა ინტელექტუალური ასპარეზობა „ბიგ რაუნდი“, რომელშიც ხაშურის მუნიციპალიტეტის 27 სკოლის უფროსი კლასის მოსწავლეები მონაწილეობენ.

„Let do it“ საქართველოსთან თანამშრომლობის ფარგლებში, გაიმართა მრავალი აქტივობა სხვადასხვა მიმართულებით: დასუფთავების, გამწვანების, კედელზე ხატვის აქციები. აღნიშნულ ორგანიზაციასთან ურთიერთთანამშრომლობით, ხაშურის მუნიციპალიტეტის მერიას სტუმრობდა ესტონეთის დელეგაცია. let do it world-ის ორგანიზაციის პრეზიდენტმა და ექსპერტებმა მუნიციპალიტეტის თანამშრომლებს, ნარჩენების მართვის მიმართულებით, ესტონური გამოცდილება გააცნეს, ასევე იმსჯელეს ეკოლოგიური კუთხით არსებულ პრობლემებზე და ადგილობრივ საჭიროებებზე.

გაეროს ბავშვთა ფონდისა და აშშ-ის საერთაშორისო განვითარების სააგენტოს მხარდაჭერით, ხაშურის მუნიციპალიტეტის მერიას გადაეცა სერთიფიკატი, პროექტში „მოზარდი მოხალისეების ჩართულობა პანდემიის გამოწვევების საპასუხოდ საქართველოში“ შეტანილი განსაკუთრებული წვლილისათვის.

განათლების კულტურის და სპორტის სამსახურის ხელშეწყობით, კონკრეტული შემსრულებლებისთვის და შემოქმედებითი ჯგუფებისთვის შესაძლებელი გახდა არაერთ საერთაშორისო თუ ადგილობრივ ფესტივალზე მონაწილეობა.

რაც შეეხება სამომავლო გეგმებს,:

საქართველოს მთავრობის დახმარებით და ადგილობრივი ბიუჯეტის რესურსების გონივრული გამოყენებით, მუნიციპალიტეტის მერია მნიშვნელოვან ღონისძიებებს განახორციელებს მოსახლეობის სოციალური მდგომარეობისა და არსებული ინფრასტრუქტურის გაუმჯობესების მიზნით. აქვე ხაზგასმით მინდა აღვნიშნო, რომ ჩვენი საქმიანობის განმავლობაში, მუდმივად ვგრძნობდით უდიდეს მხარდაჭერას როგორც საქართველოს მთავრობის, ისე რეგიონის ხელმძღვანელობის მხრიდან, რისთვისაც უდიდეს მადლობას ვუხდით მათ.

საკრებულოს თავმჯდომარის ანგარიში

(გაგრძელება)

-2022 წლის 7 აპრილს, ხაშურის მუნიციპალიტეტის მერიის საფინანსო-სამოქალაქო სამსახურის ხელმძღვანელმა ლელა მაჭარაშვილმა წარმოადგინა „ხაშურის მუნიციპალიტეტის 2021 წლის ბიუჯეტის შესრულების წლიური ანგარიში“ დასამტკიცებლად. საკრებულოს წევრების მიერ დასმულ იქნა არაერთი შეკითხვა, წარმოდგენილი ანგარიში შეფასდა დადებითად, მიღებულ იქნა გადაწყვეტილება მისი დამტკიცების შესახებ.

-2022 წლის 10 იანვარს, საკრებულოს მორიგ სხდომაზე, მუნიციპალიტეტის მერიის ადმინისტრაციული სამსახურის საზოგადოებასთან ურთიერთობის და საინფორმაციო განყოფილების 2021 წლის ანგარიში წარმოადგინა- განყოფილების ხელმძღვანელმა ნინო სუხიაშვილმა. ისაუბრა იმ მრავალფეროვან მიმართულებებზე, რომელსაც მერია ახორციელებს საზოგადოებასთან ურთიერთობის კუთხით. განყოფილების მუშაობა საკრებულომ დადებითად შეაფასა.

-2022 წლის 3 თებერვალს საკრებულოს მორიგ სხდომაზე, მოისმინეს და შეაფასეს ხაშურის მუნიციპალიტეტის მერიის ა(ა)იპ „ხაშურსერვისი“-ს მიერ 2021 წლის პერიოდში გაწეული საქმიანობა. საკრებულომ დადებითად შეაფასა.

-2022 წლის 3 თებერვალს, საკრებულოს მორიგ სხდომაზე მოვისმინეთ მერიის საქმის წარმოებისა და ადამიანური რესურსების მართვის განყოფილების უფროსის ირმა ნოზაძე-ჩადუნელის ინფორმაცია ხაშურის მუნიციპალიტეტის მერიის ელექტრონული საქმისწარმოების წესის შესახებ, რომელსაც არეგულირებს საქართველოს მთავრობის 2012 წლის 21 თებერვლის №64 დადგენილება. აღნიშნული წესი მხარდაჭერილ იქნა საკრებულოს მიერ.

-2022 წლის 4 მარტს, საკრებულოს მორიგ სხდომაზე ხაშურის მუნიციპალიტეტის მერიის სამხედრო აღრიცხვისა და გაწვევის სამსახურის უფროსმა მიხეილ ბარბაქაძემ წარმოადგინა ანგარიში 2021 წელს გაწეული მუშაობის შესახებ. დასვა შეკითხვები სამოქალაქო თავდაცვის სასკოლო საგნად ჩასმის თაობაზე, იმ საკითხებზე, რომელიც, ზოგადად, სამხედრო გაწვევას უკავშირდება. ხაშურის მუნიციპალიტეტის მერიის სამხედრო აღრიცხვისა და გაწვევის სამსახურის მიერ 2021 წლის პერიოდში გაწეული საქმიანობა საკრებულომ დადებითად შეაფასა.

-2022 წლის 7 აპრილს, მერიის ინფრასტრუქტურის განვითარების და კეთილმოწყობის სამსახურის ხელმძღვანელმა გიორგი პაპიაშვილმა საკრებულოს სხდომაზე წარმოადგინა, სოფლის მხარდაჭერის პროგრამის ფარგლებში, 2022 წელს, ხაშურის მუნიციპალიტეტის დასახლებებში განსახორციელებელი პროექტების ნუსხა დასამტკიცებლად და ინფორმაცია პროგრამის განხორციელებისათვის საქართველოს სახელმწიფო ბიუჯეტიდან გამოყოფილი თანხის განაწილების შესახებ. საკრებულომ მხარი დაუჭირა, 2022 წელს, ხაშურის მუნიციპალიტეტის დასახლებებში განსახორციელებელი სოფლის მხარდაჭერის პროგრამის ფარგლებში სოციალურ ეკონომიკური პროექტების ნუსხის დამტკიცების და პროგრამის განხორციელებისათვის საქართველოს სახელმწიფო ბიუჯეტიდან გამოყოფილი თანხის განაწილების შესახებ დადგენილების პროექტს.

-მერიის სიცრვითი მოწყობისა და არქიტექტურულ-სამშენებლო საქმიანობის რეგულირების განყოფილების უფროსმა ლია ჯიქურაშვილმა წარმოადგინა განკარგულების პროექტი, სასტუმროების კომპლექსის მშენებლობისათვის შპს „პარკპოტელის“ კუთვნილი მიწის ნაკვეთის (მდებარე ხაშურის მუნიციპალიტეტი, დაბა სურამი, ჩუმათელეთი, საკადასტრო კოდი 69.04.56.308) განაშენიანების დეტალური გეგმის კონფერენციის დამტკიცების თაობაზე დაბა სურამის ტერიტორიისთვის დამტკიცებული გენერალური გეგმის მიხედვით. წარმოდგენილი პროექტი მხარდაჭერილ იქნა საკრებულოს მიერ.

-2022 წლის 5 მაისს, საკრებულომ დაამტკიცა განკარგულების პროექტები არასამეწარმეო (არაკომერციული) იურიდიული პირის „ხაშურსერვისის“ რეორგანიზაციის (შიდა სტრუქტურის ნაწილობრივი ცვლილება) დაწყების თაობაზე და არასამეწარმეო (არაკომერციული) იურიდიული პირის - „წყლისა და გამწვანების კომპანიის“ დაფუძნებაზე ხაშურის მუნიციპალიტეტის მერიისათვის თანხმობის მიცემის შესახებ. საკითხს მოჰყვა კამათი და მსჯელობა, რაზეც განმარტებები გააკეთეს მერიის სამსახურების წარმომადგენლებმა.

-2022 წლის 7 ივლისს, საკრებულოს სხდომაზე, მერიის ა(ა)იპ „საზოგადოებრივი ჯანდაცვის ცენტრის“ დირექტორმა დავით ჩიქოვანმა წარმოადგინა ანგარიში გაწეული მუშაობის შესახებ. დეპუტატებს ჰქონდათ შეკითხვები პანდემიის რისკების შემცირებასთან დაკავშირებით. საკრებულომ დადებითად შეაფასა საზოგადოებრივი ჯანდაცვის ცენტრის მუშაობა საანგარიშო პერიოდში, მაღლობა გადაუხადა მის ხელმძღვანელს და თითოეულ თანამშრომელს.

-2022 წლის 3 თებერვალს, მერიის ეკონომიკური განვითარების სამსახურის მუნიციპალური ქონების აღრიცხვის და მართვის განყოფილების ხელმძღვანელმა ბექა მისურაძემ საკრებულოს დასამტკიცებლად წარუდგინა ხაშურის მუნიციპალიტეტის საკუთრებაში არსებული ქონების საპრივატიზაციო ობიექტების ნუსხა. ნუსხასთან ერთად წარმოადგინა ამ ობიექტების ფოტოსურათები და დეპუტატებთან ისაუბრა პრივატიზაციის პროცესის მნიშვნელობაზე. საკრებულოს წევრებმა მხარი დაუჭირეს წარმოდგენილ საკითხს.

-საკრებულოს სხდომაზე, მერიის ეკონომიკური განვითარების სამსახურის ხელმძღვანელმა სერგო ლალიაშვილმა წარმოადგინა საკითხი ხაშურის მუნიციპალიტეტის საკუთრებაში არსებული უძრავი ქონების (ს/კ 69.08.21.280.01.501) პირდაპირი განკარგვის წესით, უსასყიდლო უზუფრუქტის ფორმით, „ხაშურის მუნიციპალიტეტის საბიბლიოთეკო ცენტრთან“ გადგენის თაობაზე. აღნიშნულ საკითხთან დაკავშირებით საკრებულოს წევრებმა მხარი დაუჭირეს მერიისთვის თანხმობის მიცემას.

-2022 წლის 7 ივლისს საკრებულოს მორიგ სხდომაზე, მერიის ეკონომიკური განვითარების ხელმძღვანელმა წარმოადგინა საკითხი-ხაშურის მუნიციპალიტეტის ბალანსზე არსებული ამორტიზებული მოძრავი ქონების ჩამოწერის თაობაზე თანხმობის მიცემის შესახებ. მისი ინფორმაციით, მერიამ 2021 წელს ჩაატარა ამორტიზებული მოძრავი ქონების ინვენტარიზაცია, რის შემდეგაც, 2021 წლის 31 დეკემბერს, აუდიტორული კომპანია „შპს „ალსო-ს“ მიერ, განხორციელდა აღნიშნული ამორტიზებული მოძრავი

ქონების შეფასება, გამომდინარე აქედან, მუნიციპალიტეტს მიზანშეწონილად მიაჩნია გამხორციელებდეს აღნიშნული მოძრავი ქონების ჩამოწერა/განადგურება. საკრებულოს წევრებმა მხარი დაუჭირეს წარმოდგენილ საკითხს.

-2022 წლის 2 ივნისს, ხაშურის მუნიციპალიტეტში შპს პირების დასაქმების ხელშეწყობის პროგრამის შემუშავების მიზნით, შეიქმნა დროებითი სამუშაო ჯგუფი.

ჯგუფში მოწვეულ იქნა ხაშურის კეთილდღეობისა და განვითარების ცენტრი- „მომავლის სახლი-ს“ და II საჯარო სკოლასთან არსებული „დღის მოვლის ცენტრის“ დამფუძნებლები.

შეხვედრაზე განიხილეს, შპს პირთა აღრიცხვა-დასაქმების ხელშეწყობის მიზნით, ერთიანი ბაზის და დამსაქმებელთა რეესტრის შექმნის საკითხი. ისაუბრეს იმ პრობლემების გამოვლენის შესახებ, რომლებიც შპს პირებს დასაქმების კუთხით აქვთ და რა ტიპის მომსახურება შეიძლება შესთავაზოს მუნიციპალიტეტმა მათ დასაქმების ხელშეწყობისთვის.

პროფესიული სასწავლებლის პროგრამების ინკლუზიურობაზე ისაუბრა კოლეჯ „ქართლის“ დირექტორმა ხათუნა ლობჯანიძემ.

„მმართველობითი სისტემების განვითარების ცენტრის“ პროექტის - „ანგარიშვალდებული საკრებულოს წევრი ძლიერი დემოკრატიისთვის“ ფარგლებში, პროექტში მონაწილე ხაშურის მუნიციპალიტეტის საკრებულოს წევრებისათვის შემუშავდა თემატური შეხვედრების განრიგი, რომლის ფარგლებშიც შეხვედრა ჩავატარეთ სოფ.ალის მოსახლეობასთან.

მოსახლეობასთან საუბარში გამოიკვეთა შემდეგი პრობლემები:

- სარწყავი წყლის პრობლემა;
- სოფ.ბრილის საჯარო სკოლის ავარიული შენობის რეაბილიტაცია;
- ალის საჯარო სკოლაში ცენტრალური გათბობის გაკეთება;
- სოფლის სასაფლაომდე მისასვლელი გზის კეთილმოწყობა;
- სოფ.ალის საბავშვო ბაგა-ბაღის შემოღობვა;
- სოფლის შესასვლელში აღმართული II მსოფლიო ომის მემორიალის რეაბილიტაცია;
- გათბობა სამედიცინო ამბულატორიაში;

როგორც იყო უკუკავშირი: სარწყავი წყლის პრობლემა-გარემოს დაცვის ეროვნული სააგენტო ამბობს უარს, რადგან კალაპოტის არაბუნებრივად აღდგენამ, წყლის მომატებისას შესაძლოა მოსახლეობის დატბორვა გამოიწვიოს;

სოფ.ბრილის საჯარო სკოლის ავარიული შენობის რეაბილიტაცია-მერიის შესაბამის სამსახურს შეუძლია გააკეთოს დასკვნა, რომელსაც გადასცემს განათლების სამინისტროს სსიპ-ს, ასევე შეგვიძლია შუამდგომლობის გაწევა, რომ სამინისტრომ პრიორიტეტების დალაგებისას გაითვალისწინოს. ამ ეტაპზე, მუნიციპალიტეტის დიდი ჩართულობით,

სამინისტროსაგან თანხა გამოყოფილია სკოლაზე, რომელიც დამოუკიდებლად გამოაცხადებს ტენდერს;

ალის საჯარო სკოლაში ცენტრალური გათბობის გაკეთება-მერიის შესაბამის სამსახურს პროექტი მზად აქვს, თუ განათლების სამინისტრო მიზნობრივ ტრანსფერს გამოუყოფს მუნიციპალიტეტს, სამუშაოებს ჩაატარებს მერია, თუ არა და ეს სამუშაო განათლების სამინისტრომ უნდა შეასრულოს;

სოფლის სასაფლაომდე მისასვლელი გზის კეთილმოწყობა-მერიის შესაბამის სამსახურს პროექტი მზად აქვს, პროექტის ღირებულებაა 642 000 ლარი, სამუშაოები 2023 წელს დაიწყება;

სოფ.ალის საბავშვო ბაგა-ბაღის შემოღობვა-მერიის შესაბამისი სამსახურის მიერ მიმდინარეობს წინასაპროექტო დოკუმენტაციის მომზადება;

გათბობა სამედიცინო ამბულატორიაში-მერიის შესაბამისი სამსახურის მიერ უნდა მომზადდეს ხარჯთაღიწვევა, აქ პრობლემაა გაზომომარაგებაც, დოკუმენტაცია მზადაა ტენდერის გამოსაცხადებლად;

-2022 წლის 1 მარტს, ხაშურის მუნიციპალიტეტმა უკრაინისათვის ჰუმანიტარული ტვირთის შეგროვება დაიწყო. მუნიციპალიტეტის ხელმძღვანელობამ აქციაში ჩართვისკენ მოუწოდა სამოქალაქო საზოგადოებას, ბიზნესს, ხაშურის მუნიციპალიტეტის ყველა მოქალაქეს.

-1921 წლის 4-6 მარტს, ქართული არმიის მიერ წითელი არმიის წინააღმდეგ კონტრშეტევა განხორციელდა. ხაშურში განთავსებული იყო მთავარსარდლის შტაბი და მათი დაცვა ევალებოდათ იუნკერთა სასწავლებლის კურსანტებს. ოსიურთან შეტაკებისას 120 ქართველი ჯარისკაცი დაიღუპა. ოსიურთან, ქართველი გმირებისა და იუნკერების ხსოვნის პატივისცემის ნიშნად მემორიალი გვირგვინით შევამკეთ.

-2022 წლის 8 მარტს, ხაშურის მუნიციპალიტეტის მერიის და საკრებულოს წარმომადგენლებმა ქალთა საერთაშორისო დღე მივულოცეთ საგანგებო სიტუაციების კოორდინაციისა და გადაუდებელი დახმარების ცენტრის ხაშურის ფილიალის პერსონალს და ა(ა)იპ „ხაშურის საზოგადოებრივი ჯანმრთელობის დაცვის ცენტრის“ თანამშრომელ ქალბატონებს.

-2022 წლის 8 მარტს ხაშურის მუნიციპალიტეტის მერიის და საკრებულოს წარმომადგენლებმა ასევე ქალთა საერთაშორისო დღე მივულოცეთ მუნიციპალიტეტში მცხოვრებ უზუცეს ქალბატონებს - ნინო გელაშვილს და მარიამ დოფიძეს.

-2022 წლის 10 მარტს, ხაშურის მუნიციპალიტეტის მერთან ერთად მონაწილეობა მივიღეთ საქართველოს ადგილობრივი თვითმმართველობის წარმომადგენელთა რიგით მეშვიდე ეროვნული ასამბლეას მუშაობაში. ყურადღება გამახვილდა ათეას როლზე ადგილობრივი დემოკრატიის განვითარების პროცესში, როგორც ეროვნულ, ისე საერთაშორისო დონეზე, ხაზი გაესვა მისი საქმიანობის მნიშვნელობას. ღია კენჭისყრით არჩეულ იქნა ათეას პრეზიდენტი, ასევე, ხმათა უმრავლესობით დამტკიცდა ათეას აღმასრულებელი საბჭოს შემადგენლობა, რომელიც ყველა რეგიონიდან წარდგენილი კანდიდატებით დაკომპლექტდა.

ასევე, არჩეულ იქნა ასოციაციის აღმასრულებელი საბჭო. დასკვნით ნაწილში ასოციაციის სამომავლო გეგმებზე ისაუბრეს ევროსაბჭოს წარმომადგენლებმა.

-2022 წლის 16 მარტს, ხაშურის მუნიციპალიტეტის საკრებულოში, მერიის სამსახურის ხელმძღვანელებთან ერთად, გაიმართა შეხვედრა „საზოგადოება ბილიკის“ ხელმძღვანელს მარიკა მღებრიშვილსა და მისი გუნდის წევრებს შორის- შპს პირთა დასაქმების ხელშეწყობისა და შრომის პოლიტიკის ოპტიმიზაციის საკითხებზე სასაუბროდ.

-2022 წლის 18 მარტს ააიპ „მმართველობითი სისტემების განვითარების ცენტრის“ და ხაშურის მუნიციპალიტეტის საკრებულოს შორის ურთიერთთანამშრომლობის მემორანდუმში გაფორმდა. მემორანდუმის მიზანია პროექტის - „ანგარიშვალდებული საკრებულოს წევრი ძლიერი დემოკრატიისთვის“ ფარგლებში, მხარეთა შორის

(დასასრული VI გვერდზე)

საკრებულოს თავმჯდომარის ანგარიში

(დასასრული)

ურთიერთთანამშრომლობის ჩამოყალიბება.

-2022 წლის 21 მარტს, ხაშურის მუნიციპალიტეტის მერთან და სამსახურების ხელმძღვანელებთან ერთად, „მომაველის სახლის“ დღის ცენტრში, დაუნის სინდრომის მსოფლიო დღე აღვნიშნეთ. დღის ცენტრის ბავშვებმა „ვინი პუჰის“ თეატრალური წარმოდგენა შემოგვთავაზეს და თავიანთი შესაძლებლობებით გაოცებულები დაგვტოვეს.

-2022 წლის 8 აპრილს, ხაშურის მუნიციპალიტეტის საკრებულომ დიდი საზოგადოებრივი ინტერესიდან გამომდინარე, პროფესიული სასწავლებლის- „ქართლის“ ადმინისტრაციის წარმომადგენლებს უმასპინძლა. კოლეჯის დირექტორმა ხათუნა ლობჯანიძემ ისაუბრა პროფესიული საგანმანათლებლო დაწესებულების ხედვის, უახლოესი ამოცანების და მიზნების შესახებ, რომ კოლეჯის გრძელვადიანი, მოკლევადიანი და სხვა პროფესიული საგანმანათლებლო პროგრამები შერჩეულია შრომის ბაზრის კვლევებზე დაყრდნობით. გათვალისწინებულია ადგილობრივი სამრეწველო ბაზრის მოთხოვნები.

-2022 წლის 8 აპრილს, ხაშურის მუნიციპალიტეტის საკრებულომ დიდი საზოგადოებრივი ინტერესიდან გამომდინარე, საინფორმაციო ხასიათის შეხვედრა გამართა სოფლის განვითარების სააგენტოს ხაშურის საინფორმაციო-საკონსულტაციო ცენტრის წარმომადგენლებთან. პროგრამების პოპულარიზაციის, ახალგაზრდების მოტივაციის ამაღლების და კომუნიკაციის გაუმჯობესების მიზნით, საკრებულო გააგრძელებს თანამშრომლობას საინფორმაციო-საკონსულტაციო ცენტრთან.

-2022 წლის 4 მაისს, გერმანიის საერთაშორისო თანამშრომლობის საზოგადოების GIZ-ის მხარდაჭერით, „მმართველობითი სისტემების განვითარების ცენტრის“ პროექტის - „ანგარიშვალდებული საკრებულოს წევრი ძლიერი დემოკრატიისთვის“ ფარგლებში, 10 საპილოტე მუნიციპალიტეტში საკრებულოს შერჩეული წევრებისათვის ბორჯომში ტრენინგი გაიმართა. შეხვედრის მიზანს წარმოადგენდა ადგილობრივი თვითმმართველობის განხორციელების პროცესში მოქალაქეთა მონაწილეობის გაძლიერება, ამომრჩევლის და მის არჩეულ საკრებულოს წევრს შორის ეფექტური, ხელმისაწვდომი საკომუნიკაციო არხების დანერგვა და კარგი პრაქტიკის დამკვიდრება.

-2022 წლის 15 მაისს, ნატოსა და ევროკავშირის საინფორმაციო ცენტრის ინიციატივით „ევროპის დღეები-2022“-ის ფარგლებში, სოფ. ქვიშხეთში, დიმიტრი ყიფიანის სახელმწიფო უნივერსიტეტის ეზოში, ახალგაზრდებთან საინფორმაციო-შემეცნებითი შეხვედრა გაიმართა. ახალგაზრდებმა მიიღეს ინფორმაცია საქართველოს ევროინტეგრაციის პროცესისა და მისი სარგებლობის შესახებ.

-2022 წლის 17 მაისს, ხაშურის მუნიციპალიტეტში შედგა შეხვედრა გერმანიის საერთაშორისო თანამშრომლობის საზოგადოება (GIZ)-სა და მერიის სამსახურებს შორის, საკრებულოს ჩართულობით-ხაშურის მუნიციპალიტეტში გენდერული ბიუჯეტირების დანერგვის თაობაზე. გენდერული ბიუჯეტირება ინოვაციური მიდგომაა, რაც გულისხმობს გენდერული თანასწორობის ასპექტების ჩართვას საბიუჯეტო პროცესში. გენდერული ბიუჯეტირება არ გულისხმობს ქალთა და მამაკაცთათვის განსხვავებული ბიუჯეტის შედგენას ან ბენეფიციართა დაყოფას გენდერულ ჭრილში, არამედ იგი წარმოადგენს საბიუჯეტო პროცესის იმგვარ ფორმირებას, რაც გულისხმობს საბიუჯეტო სახსრების თანასწორობად და ინკლუზიურად გადანაწილებას.

-2022 წლის პირველ ივნისს, ხაშურის მუნიციპალიტეტის საბავშვო ბაღების გაერთიანების ორგანიზებით, ბავშვთა დაცვის საერთაშორისო დღისადმი მიძღვნილი კონფერენცია გაიმართა, მივიღეთ აქტიური მონაწილეობა, კონფერენციის შემდეგ ხაშურის ცენტრალურ პარკში საბავშვო ბაღების აღსაზრდელთა მიერ მომზადებულ სახალისო აქტივობებსაც შევეერთდით. ხაშურისა და ქარელის მაჟორიტარი დეპუტატის ბიუროს წარმომადგენლებთან ერთად, ბავშვთა დაცვის საერთაშორისო დღე მივულოცეთ კეთილდღეობისა და განვითარების ცენტრს- „მომაველის სახლს“, აღსაზრდელებმა თავიანთი შემოქმედება გვიჩვენეს და შესაბამისი სიგელებიც დაიმსახურეს.

-ხაშურის მუნიციპალიტეტის დელეგაცია, ევროპის ქვეყნების 10 მუნიციპალიტეტთან ერთად, ლატვიის რესპუბლიკის, ქალაქ ბაუსკას მუნიციპალიტეტში იმყოფებოდა. ხაშურის მუნიციპალიტეტის მერმა თენგიზ ჩიტიაშვილმა და ლატვიის რესპუბლიკის ბაუსკას მუნიციპალიტეტის მერმა აივარს ოკმანისმა, ხაშურისა და ბაუსკას მუნიციპალიტეტების მოქალაქეთა სახელით, პარტნიორობის განახლებულ ხელშეკრულებას ხელი მოაწერეს.

-2022 წლის 15 ივნისს, ხაშურის მუნიციპალიტეტის მერიის სამსახურებთან ერთად, გაიმართა სამუშაო შეხვედრა ორგანიზაცია GIZ -ის წარმომადგენლებთან, განხილულ იქნა სამოქალაქო (მონაწილეობითი) ბიუჯეტირების პროცედურები, სწორედ GIZ უწევს არა მხოლოდ ტექნიკურ დახმარებას ამ პროცესს. შეხვედრის მიზანია გაიზარდოს მოქალაქეთა ჩართულობა მუნიციპალური ბიუჯეტის დაგეგმვის და განხორციელების ეტაპზე.

-2022 წლის 18 ივლისს, ხაშურის მუნიციპალიტეტში, სლოვაკმა ექსპერტებმა სამუშაო შეხვედრა გამართეს, შეხვედრის ფარგლებში მათ განიხილეს:

- რეგიონული განვითარების;
- სოციალური მეწარმეობის;
- სოფლის მეურნეობის;
- მწვანე ინოვაციების საკითხები.

პროექტი „ადმინისტრაციული საზღვრის გასწვრივ თვითმმართველი თემების განვითარება და სლოვაკეთის გამოცდილების გაზიარება“ SlovakAid-ის მხარდაჭერით, ორგანიზაცია “მეგობრობის ხიდი ქართლისის” და სლოვაკური ორგანიზაცია ME-SA10-ის მიერ ხორციელდება.

-გორის საკრებულოს წევრებთან ერთად საქართველოს ტერიტორიული მთლიანობისთვის დაღუპული მებრძოლების ხეივანში, პატივი მივაგეთ 2008 წლის 8 აგვისტოს ომის გმირებს

-2021 წლის 18 დეკემბერს, სურამის სადაბო პოლიკლინიკაში, კლინიკა „ენმედიცის“ საქველმოქმედო აქცია ჩატარდა. კლინიკის და მუნიციპალიტეტის წარმომადგენლებმა უზრუნველყვეს პაციენტების სოფლებიდან ჩამოყვანა. კლინიკის წარმომადგენლებთან შეთანხმებით, რომ საქველმოქმედო აქცია ერთჯერადი არ იქნება და პაციენტებს სამომავლოდაც შეეძლებათ მაღალი კვალიფიკაციის ექიმების მომსახურება მიიღონ.

-2022 წლის 21 იანვარს, სახელმწიფო რწმუნებულის აპარატსა და ხაშურის

მუნიციპალიტეტის მერიასთან ერთად, საკრებულო აქტიურად შეუერთდა ვაქცინაციის კამპანიას და მასთან დაკავშირებული წამახალისებელი პროგრამების პოპულარიზაციის მიზნით გამართულ შეხვედრებს.

-ვაქცინაციის კამპანიის და მასთან დაკავშირებული წამახალისებელი პროგრამების პოპულარიზაციის მიზნით, შევხვდით სოფ ალისა და სოფ.ქვიშხეთის მოსახლეობას და საინფორმაციო ბუკლეტები დავურიგეთ.

-2022 წლის 24 ივნისს, სამედიცინო კლინიკა „კარდიო“-სა და შპს „სისტოლას“ ინიციატივით და ხაშურის მუნიციპალიტეტის ორგანიზებით, სოფ.ქვიშხეთის მოსახლეობის უფასო სამედიცინო გამოკვლევები ჩატარდა. აქციის მიზანი გახლდათ ადგილობრივი მოსახლეობის ჯანმთელობის მდგომარეობის სხვადასხვა დარღვევათა ადრეული დიაგნოსტიკა და შემდგომი მკურნალობის ტაქტიკის განსაზღვრა.

-2022 წლის 13 დეკემბერს, საქართველოს პარლამენტის ეროვნული ბიბლიოთეკის და მოძრაობა „ეკვილიბრიუმის“ ინიციატივით, ხაშურის სკვერის ბიბლიოთეკა გაიხსნა ე.წ. „წიგნის ბუდე“, რომლის წიგნებით აღჭურვაში მონაწილეობა მიიღო ხაშურის მუნიციპალიტეტის მერმა და საკრებულოს დეპუტატებმა.

-2022 წლის 17 დეკემბერს, ხაშურის მუნიციპალიტეტის მერთან და კულტურის სამსახურთან ერთად დიმიტრი ყიფიანის მუზეუმს ვეწვიეთ და მუზეუმის განვითარების პერსპექტივაზე ვიმსჯელებთ. დიმიტრი ყიფიანის მუზეუმში 600-ზე მეტი ექსპონატია დაცული. აქ წარმოდგენილია როგორც მემორიალური, ისე ეთნოგრაფიული ხასიათის ნივთები. ფოტო- მასალა და დოკუმენტები. ვიმყოფებოდით, ასევე მუზეუმის ფონდსაცავში, სადაც 100 000-ზე მეტი ექსპონატია დაცული. მუზეუმის განვითარების სამომავლო პერსპექტივებიდან გამომდინარე აუცილებელია ამ ექსპონატების განსათავსებელი ადაპტირებული სივრცე, რაც მუზეუმს მოცულობით დიდი ექსპოზიციების გაკეთების საშუალებას მისცემს და საკუთარ შემოსავლებს გაუზრდის.

-2022 წლის 25 დეკემბერს ხაშურში სახალწლო ნაძვისხე საზეიმოდ აინთო

-2022 წლის 30 აპრილს, ხაშურის მუნიციპალიტეტის მერიასთან ერთად, მონაწილეობა მივიღეთ სსიპ ქალაქ ხაშურის 1 საჯარო სკოლის მიერ მოწყობილ „განათლების გამოფენა - 2022“-ში, სკოლის მოსწავლეების ინოვაციურმა ნამუშევრებმა საყოველთაო მოწონება დაიმსახურა.

-2022 წლის 6 მაისს, დავესწარიტ ხაშურის თოჯინების თეატრის ახალი სეზონის გახსნას. პანდემიის შემდეგ ეს იყო სერიოზული განაცხადი თეატრისათვის.

-2022 წლის 26 მაისს, ხაშურის მუნიციპალიტეტის მერთან და მერიის სამსახურებთან ერთად, საქართველოს დამოუკიდებლობის დღესასწაულთან დაკავშირებით, გვირგვინებით შევამკეთ საქართველოს ტერიტორიული მთლიანობისთვის დაღუპულ გმირთა საფლავები...

-2022 წლის 15 ივნისს, ვესტუმრეთ „ხაშურის ბავშვთა და მოზარდთა შემოქმედებითი განვითარების ცენტრს“, სადაც მოეწყო მოსწავლეთა ნამუშევრების გამოფენა.

-2022 წლის 21 ივნისს, სასწავლო წლის ბოლო დღეს, წრომის №16 საბავშვო ბაღის აღსაზრდელებთან და მათ მშობლებთან ერთად შევხვდით. გაიმართა სპორტული შეჯიბრებები, რომლებშიც მშობლებმა და მოწვეულმა სტუმრებმა მიიღეს მონაწილეობა, გამარჯვებულებს კი ჟიური ავლენდა.

-2022 წლის 10 აგვისტოს, ხაშურის მუნიციპალიტეტის მერთან ერთად, მინისტრის დასახლებაში მოხდა რეაბილიტირებული ბიბლიოთეკის, როგორც ახალი შექმენებით-საგანმანათლებლო სივრცის გახსნა.

- პრობლემები:
- დავით საყვარელიძის საცხოვრებლად გამოუსადეგარი სახლი სოფელს ალში-სამწუხაროდ მუნიციპალიტეტში თუნდაც მცირე ზომის კოტეჯის მშენებლობის პროგრამაც არ გვაქვს. ერთადერთი რაც შეგვიძლია მას შევთავაზოთ, ესაა სოციალურ პროგრამაში უსახლკარო მუხლი, რომელიც 1 კალენდარული წლით საცხოვრებელი ფართის ქირავნობას გულისხმობს, მაქსიმალური ღირებულებით 180 ლარი.
 - მერიის ჯანდაცვის სამსახურის და ინფრასტრუქტურის სამსახურის წარმომადგენლებთან - გიორგი ცერცვაძესა და გიორგი პაპიაშვილთან ერთად, ვაჟა-ფშაველას ქუჩაზე, დევნილთა საერთო დასახლებაში მცხოვრები სოციალურად დაუცველი 41 წლის ქალბატონი მოვინახულეთ. ქალბატონი შშმ პირია და დახმარების გარეშე მეორე სართულიდან ეზოში ჩასვლას ვერ ახერხებს.
 - უსახლკარო ძაღლების პრობლემა-გორში ფუნქციონირებს ინტერმუნიციპალური თავშესაფარი, ემსახურება 4 მუნიციპალიტეტს, რომელსაც ყოველწლიურად ვუხდით 170 000 ლარამდე. შედეგი-უამრავი უსახლკარო ძაღლი ქალაქში.
- სამომავლო გეგმები:
- საკრებულოს წევრის ანგარიშვალდებულების გზამკვლევი და საკრებულოს წევრის ბლოკნოტი ყველა დეპუტატს;
 - სოციალური საწარმოს დაფუძნება ხაშურის მუნიციპალიტეტში.

მზევინარ (მზეო) რევაზიშვილის სსოვნას!

ჩვენო დიდო ტკივილო, ჩვენო გმირო, გაუტყეხელო და შეუპოვარო მეზობელო და მეგობარო. ზოგჯერ გმირებიც მარცხდებიან, მაგრამ მაინც გმირებად რჩებიან, შენც სამუდამოდ გმირად დარჩები შენი ოჯახის წევრების, მეგობრების და მეზობლების გულებში.

გმირები არიან შენი შვილებიც, რომლებმაც უკანასკნელი ძალისხმევა გაიღეს შენს გადასარჩენად, გადაგარჩინეს კიდევ, მაგრამ ამაოდ... ბედის სიმუხთლემ მაინც წაგვართვა შენი თავი და დაგვიტოვა გაუსაძლისი ტკივილი, ჩვენო საყვარელო, უძვირფასესო ქალბატონო. დმერთმა ნათელში გამყოფოს შენს სამუდამო სამყოფელში, ჩვენო დაუვიწყარო მზევინარ!

უახლოესი მეზობლები



ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.
 E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.
 P-ით მონიშნული სტატია იბეჭდება დაკვეთით გაზეთი იბეჭდება თბილისში.